

COLOSENSES

Colosa Jiinjeri Iicamedi Pablo Acaatiniuhaame. Pablo Caatiniuhi Colosa Cuumiri Iicaja Moocaani Iijaminaadi.

1 Uujoho Pablo Moocaani jeebii iimogobadi Cristo Jesu minisuminaafi, diibo agalluubo eneejiruno. Sano monahabo Timoteoma ²jiihaameque macaatinihi Colosa cuumiri iicamo Cristoco imiyaavogomo Moocaaniti iicamedi. Jaafa Dios Moocaani amiihaico imino omooniboro isajeebiico acihi.

Pablo Moocaanima Iimaahi Miyaavogominaahallivi.

³Fahijjivaro Moocaanico Mohaivojjiibo Jesucristo Caanico mihimehichahi diiboma amiihaihallivi mihiimaamor. ⁴Miihai amiihaiti muguubuhi Cristo Jesuco mimiyaavogonoco, tolliro bu paryi Moocaaniti iicamoco magaijinoti icano. ⁵Jilli amiihai momoonihichahi, amiihaidi niquejefano ificuucininoco motoomoro. Jaamo amiihai toono eesicininoma mihicahi taajasujjibogoco muguubuunofano. ⁶Tobogocoro amiihaico ijiibuguubogo jino guiraatobogoro ofoobogo fanoojiinjirero guiraatobogoro feehi, oono amiihai Moocaani gaijiti amiihaifeenevi ihiiamaunoco muguubuuno iicaubadiro. Jaanoco amiihai magaajauhi toono gaiji miyaano iicaunoco. ⁷Jaano toonoco amiihaico magaijiibo monahabo Epafra onoobo jiibuguui. Diibo miihaima ududicamaaiubo. Jaaboma miihai mihicahi Cristoco jeevesutiibo ejeecivehicaaboma. ⁸Diibo miihaico jiiibeguehi amiihaiditi, bu amiihai Moocaani Gaija aamusunofenedi magaijicasinoditi icano.

⁹Jaamaano miihai toonoco amiihaiditi muguubuhininotiro suufenitimo Moocaanima mihiimaahicahi amiihaihallivi, dilluumoro amiihaico Moocaani igaajasuqui imino iimogonoco. Jaaboro amiihaico fanoovaaco igaajasuqui, bu fanooheedene Moocaaniti asaanoco igaajasuqui icano. ¹⁰Tolliro bu midilluhicahi jaamo imino mihicahi Aivojjiibota iicamo iicanicibadi fahijjivaro momooni diiboco imo imo omooninoco fanoova imico sihidi eetavomoro. Jaamo imino Moocaanico magaajahi. ¹¹Tolliro bu midilluhicahi amiihaico sefano imoonqui ihovosi mityari. Jaamo imo imo fanoova icarunoco majaabicahi. ¹²Jaamoro Moocaanico mihimo miihaico iimibachuuboro ufucu ita iicamoco foovohi aacjinoti niquejefano magaayicijinohallivi. ¹³Jaabo Moocaani miihaico taajasucuuhi icivono mityati. Jaaboro miihaico agaijiibo Illi aivojifaño ficuucuubo. ¹⁴Diibo miihaico taajasuhinicuui mohallivi iguijeveunofaño mohimitico ubuusuboro.

Moocaanima Sajeebii Mihicacuui Cristo Iguijeveunofenedi.

(Jn 1.3; Heb 1.2)

¹⁵Moocaani otoovoobo foovono saauhi jijjehallivi Illi ifiri. Jaabo diibo sahijjitiro iicacuubo, fanoova chahaunaacaro iicacuubo.

¹⁶ Diibofeenedi Moocaani paryi fanoovaaco eetavuuhi niquejefañó iicanehejeque, jiinjehalliri iicanehejeque icano; iifuvusunenehejeque, bu iifuvusunenehejeque icano. Tolliro bu paryi aivojinoco, paryi guinoninehejeque, bu paryi tajiibanehejeque, paryi gaijano mityanehejeque icano, paryi diibofeenedi eheetavocafutuuno diibeguiharo. ¹⁷ Cristo fanoohimegaviro icacuuihi. Jaabofeenedi paryi fanoova sahigo imino icahi. ¹⁸ Jaabadiro buunaji miihai Moocaani iijaminaa mihicamo. Jaanoti Cristo Moocaani iijaminaa Aivojiibo inigaibadi iicaabo. Jaabo sefari miihai mihicahi. Jaabo aivo iticoni gujivefañoti buheeteuhi fanoova mityahallivi diibo iicaqui. ¹⁹ Miuro Dios Moocaani Jaabo achi Jesucristo tolliro bu Dios. Jaaneri Moocaani imo imo icahi iimogobadi iicamaño. ²⁰ Tolliro bu Moocaani imuguuhi Cristofañodi paryiicino fanoovaaco sajeebii ificuunoco, paryiicino jiinjehalliri iicanehejeque, bu paryiicino niquejefañó iicanehejeque icano. Paryiicino sajeebii fanoovaaco Cristo imohovi itijoho ucuunofañodi ificucuuboro.

²¹ Iticoni naha amiihai, amiihai jeebiifañodi Moocaaniminaati mihicauhi, iiminotinoco momoonihicaumaño. Jaarumoco jisumi Moocaani ifiimaryo sajeebii ficucuuihi, ²² Cristo idaasuno ifiiri iguijeveunofeenedi. Jilli mooniubo diiboco amiihaico diibo imefeenevi ihifusuqui iimibachuuboro mihinivatimoco, imitibama chahamoco icano. ²³ Jaaneguiiha quehecuno mihica miyaavogofaño faicuvano mabacocovamoro taajasuiibogoco mimiyaavugunofeenedi mehesicininoti buhigovi minifototimo. Jaabogo jiiibogocafetehi paryi fanoojiinijeri. Jaabogoco uujoho Pablo amusuhi jiiibogoobo.

Pablo Moocaani Iijano Jeecivominaafiti Ficucafetehi.

(Ef 3.1-11)

²⁴ Jaabo jisumi amiihalliti idaasuno omooniruneri imo imo icahi. Jaamaño jilliti iifutusuuboro feehee taifiivi, oono Moocaani iijaminaaguuiha Cristo dudicamaajeque eheetavomaño idaasuno iicanofeenedi. ²⁵ Jaamaño uujoho Moocaani iija jeecivominaafiti icahi amiihaico imino mooniqui Moocaani uco atajiibaumaño, bu tolliro paryi jiinjeminaaco imino Moocaani jiiibogoco jiiibeguequi icano. ²⁶ Tolliro bu aivo siicijetiro agaajaratino, paryi siicijeminaadi toovono iicanoco gaajasuqui. Jaanoco bu Moocaani ita iicamoco gaajasucuuihi. ²⁷ Diitoco naha Moocaani imeguehi agaajasunoco ihovosi busumijeque, toono agaajaratinofañó iicanoco judiomi iicatimedi. Jaano toono agaajaratino Cristo amiihaifañó iicano. Jaabo diibo imino niquejefañó mihicajinoco mehesiciniiibo.

²⁸ Jaamaño miihai Cristoti miiibeguehicahi, bu famoovaaco mafajiihichahi. Famoovaaco magaajasuhicahi imino igaaajaqui. Jaamo famoro imino Cristofañodi ijusiqui. ²⁹ Tooneguiiha uujoho sefano ejenaauuboro Cristo uco mityaco aacinofeenedi dudicamaahicahi.

2 Jaanegui imeguehi magaajanoco sefano amiihalliti omoonicasinoco, bu tolliro Laodicea cuumiri iicamohalliti, bu paryi uco tahimeque aatyimetimohalliti icano. ² Imeguehi amiihai diito jeebiinoco mequehecutusunoco sano gaijifañó iminifotomoro paryiicino gaajaco igaayiciqui. Jaamoro imino Cristoco igaajaqui diibo Moocaani iiji gaajaratino iicauboco. Jaarunofañó jisumi diiboco magaajacuuihi. ³ Miuro diibofañó paryi gaaja, bu gaajaci icaneheje busumije paryi ficucinicuuihi. ⁴ Jilli amiihaico neehi miijoho amiihaico ihiimaari bañitimo iicaqui.

⁵Amiihaiti tehesino icaruubo tahesamaajeri amiihaifeenevi iicajirubadi icahi. Jaaboro imo imo icahi amiihai sabadiro mihicamorero quehecuno Cristoco mimiyaavogonofaño mihicanoco agaajaaboro.

⁶JaaneGUI Jesucristoco amiihai jeebii aivojiiiboti magaayiciuhi. JaaneGUIiha jisumi sano diiboma mihica, ⁷diibofañoði amiihai ifiico quehecuno mabacooconimoro mificu, sefano amiihai miyaavogoma oono amiihaico ijiiibuguubadi, fahiiijivaro Moocaanico imomoro.

Cristofañodi Bohono Ifiima Mihicano.

⁸Jeedi mehesicini. Amiihaico sita sicamañehejeque onoomoro abañinoco miyaano meneedino diito Cristofañodi icatitii. Jilli miyaminaa jeevamaajequere sivamo, miyaminaa ejeecivefinocoro sivamo icano.

⁹Jaanoi Moocaani Dios. Jaabo achi Cristo, tolliro bu Dios. ¹⁰Jaamaño amiihai paryi fanoomaryo mihicahi diiboma mihicamaño. Diiboguiinovi icano paryi tajiibaneheje, gajano mityaneheje icano. ¹¹Jaabadiro bu amiihai miquticicafutuuhi. Jaaruno ifiico iquiticifibadi icatino, jilli amiihai ifi iimogonoti mataajacuuneri. Jino naha Cristoti asaano quitici. ¹²Miio miniticafontoneri amiihai sano Cristoma micihacafetehi. Jaamoro bu sano diiboma mubuheetesucafetehi, Moocaani mitya diibo guijevefañoti siino ubuheetesuunoco mimiyaavogomaño. ¹³Iticoni naha amiihai muchuumucuuhi amiihai jeebiiifañodi amiihai imitiri, bu miquticiniutimaño icano. Jaarumoco jisumi Moocaani fiivoco acicuuhi sano amiihaico Cristoma, paryi amiihai imitico ubuusuuboro. ¹⁴Moocaani paryi mohallivi jaaducuuhi. Miihaico mohimitico eneehicaunoco finisucuubo imohovi etetecuuneri. ¹⁵Miio Cristo imohovi iguijeveuneri paryi guinonicuuhi tajiibanoco, gajano mityanoco icano miyaminaa imefeenevi guinoniuhi. Jaanoco icivojaaniuboro satyuubo imohovi iguijeveuneri toonoco iguiinoniuboro.

Niquejeonehejequere Miguiino.

¹⁶JaaneGUIiha miihaiñooba amiihaico mamachunoti, mahadunoti icano amiihaico dejedudimo, bu tolliro bohono nihiba iinuusumi jiiibaimonoco meheetavonoditi, bu jaguisifucujediti icano amiihaico dejedudimo. ¹⁷Toneheje jilli asaajino ijino iicaano. Jaanoti naha miyaabo iicaabo Cristo. ¹⁸JaaneGUI mehesicini, oono saatoho siicujebiiimobadi iicahicarumo Moocaani toomominaacoro ejeecivehicamo, amiihaico ufucu ajaadunoco magaayicijirunoco icisutimo icadino. Diito jilli aatyimetinehejeque omoonimoro: Aivo sihidi mejeevahi, noomoro quehequimaaihicamo, jilli sicamañocoro ifiitiro tolli jeevanobadi eesamaaimoro. ¹⁹Jaamo diito, Cristo monigaibadi iicaaboma gataacinitii. Jaanoti miihai Cristo ifibadi mihicamoco diibo aamusuuboro ujusisubadi ficuubo, Moocaani esamaaje onoobadi icano.

²⁰Jaanoti naha amiihai sano Cristoma miguijevecuumoro sinehejequere miyaminaa esamaajeque momoonicuutii. Jaamaño ¿collii jaamo jiiinijeminaa agaajatimobadi mihicahicahi, jiiinijeoneheje atajiiibanoguiinovi miminifotomoro? ²¹Oono:

Jinooco dudiicidino, toonoco machudino,

dihusefaño gaayicidino, ononehejequere momoonimo.

²²Paryi toneheje jilli miyaminaa tajiibanehejere. Jaano paryi finijino itajiiiba omoonihicanehejema. ²³Jaaneheje aivo gaajama iicanehejebadi

jeevajirahi, sihidi ejeevano iijicoro atajibamaño siicujeebii icanehejequere, sihidi jeevanehejeri ifiinoco omooninehejequere. Jaaruneri mofi imogonehejeque miguiinonijitirahi.

3 Jaanegui amiihai Cristoma sano mubuheetehinicuumo miguiino niquejefañoonocoro, oono Cristo Moocaani miyanaagueneri igiciniohigonehejequere. ² Jiinijeonehejequere esamaaitimo niquejeonehejequere mehesamaaje. ³ Miiro amiihaima sano Cristo miguijevahinicuui. Jaamaño jisumi amiihai ifi diiboma sano Moocaanifaño fataniicinicuui. ⁴ Jaabo Cristoro jino miilai mihicano ifi. Jaamaño diibo ubuhugaavusumi amiihai sano diiboma bu mubuhugaaveji. Jaamo diibo ovosiihaivojifaño mihicaji.

Edeehifi, Bohono Ifi Icano.

⁵ Jaaneguiiha jiinijeono amiihai ififaño icanehejeque miguijeni. Miilaiñooba buhigueejedi amiihai taabami iicatimehejema mihicadino, bu tolliro iidicunehejeque momoonidino, fanoovaaco iimeguehicanehejeque, iimitino imogonehejeque icano momoonidino. Fanoovaaco saatohoro mujuvihicinidino toono jihovo caanimi jeevobadiro jeevahi. ⁶ Tonehejehalliti niicuneru idaasuno Moocaani omoonino saahi, paryi diibo onoonoco: Jii, onootimohallivi. ⁷ Tonehejeque amiihai paryi momoonihicauhi eedehefiima mihicausumi. ⁸ Jaarumo paryi jinehejeque jisumi mejevesucu. Sifiratedino, icajisunehejeque mifinisu, bu imitinoco momoonidino, sitaaco aivono noojohoco, iidicuno iimaaneheje amiihai iijiti ihiinejirunehejeque icano mifinisu. ⁹ Fahigovavi mabañicasidino. Amiihai eedehefifico, bu iticoni momoonihicaunehejeque icano mejevesucuuonoco siino momoonicuudino. ¹⁰ Bohono ififaño mijicafutucuuno janaanivivi imitonoro ifeequi miyaabo Moocaani toonoco eheetavuuho ifi iicabadi. Jaamo imino diiboco magaaajanovi mihifetehi. ¹¹ Diibofañ chahano diito griegomi, diito judiomi, diito iquiticinimo, bu iquiticinimito, siijiinijeoto, bajiminaa, jijovoto, bu sajeebii icamo icano oononeheje. Jilli paryiicino fanoovaro Cristo. Jaabo paryi famoovafaño icahi.

¹² Amiihaico Moocaani gajiji diibotaro miicaqui amiihaico iicicuumo. Jaaneguiiha idaasugo mityanofañ mihica, imihusema, famooguiinoviro iicasunoma mihica, siicujeebii omooninoma, bu fanoova jaabicima icano. ¹³ Jaamoro sabadiro fahigovavi majaabicasi, fahigovavi amiihai iibacasico mihimibachucasi. Jaanoti bu saatoho sitaama imitino iicahachiji oono Cristo amiihai imitico iimibachucubadiro mihimibachucasi. ¹⁴ Fanoohalliviro aivo gajima mihica. Toono paryi fanoovaaco sahi agataacunoro imino fanoovaaco iifutusunono. ¹⁵ Jaaneguiiha jaafa amiihai jeebiinoco Moocaani isajeebiiri ticuvusuhi. Tooneguiiha amiihaico cuuhuvaobo saafi ifiitiro miicaqui. Jaamo diiboco mihimehicamoti mihica.

¹⁶ Tolliro bu jaafa Cristo jiiibogo amiihai jeebiinoco paryi imino gahafusuhi. Jaaneri fahigovavi mijiibogocasi, bu fanoogaajari fahigovavi mequehecucusasi. Tolliro bu Moocaanico iimono masinoco mamasiva, bu Cristo masinoco mamasiva, fanoova Moocaaniguiiha icano masinoco, diiboco amiihai jeebiifañodi imomoro mamasiva. ¹⁷ Paryi fanoovaaco monoonehejeque, meheetavonehejeque icano momooni Aivojiiho Jesu momofenedi, diiboenedi fanoovahallivi Moocaanico imomoro.

Cristota Jilli Iyotoma Iicano.

¹⁸ Gaigoomi amiihai tajemi iijiguiinovi miminifoto. Jilli mooni Aivojiibo Cristoco imiyaavogomo tolli icafihi. ¹⁹ Jaabadiro bu amiihai gaifiimi amiihai taabamico magajji. Jaamoro diitoma misifiratedino. ²⁰ Jaabadiro bu amiihai seeme amiihai caanimi, seejimi icano atajiibanoco: Jii, monoo. Toono mohaivojiiboco imo imo omoonino. ²¹ Caanimi amiihai seemeque misifiratusudino, diito ifiico mejeevevesudino. ²² Jaabadiro amiihai jeecivominaa amiihai aivojitoco fanoovavi: Jii, monoo, jiijehallivi mihicanohachuta diitoma imino mihicaquiro. Diito ihiifinicismuro icatino, jilli miya jeebiiri Moocaanico miñihicugomoro. ²³ Paryi fanoovaaco momooninoco imo imo momooni Aivojiibo Jesuco mejeevonicibadi, miyaminaaco mihicanicibadi icatino. ²⁴ Amiihairyo magaajacuui toono jaadabadi iicano Aivojiibo ibusumijeque amiihaico aacijnoco. Miiro amiihai Cristoco mejeevehicahi amiihai miya Aivojiibo iicaaboco. ²⁵ Jaabadiro bu iimitinoco omoonihicaabo toono jaadaco gaayiciji. Miiro Moocaani miyaminaaco dugaacutihi ijeevadisahaje.

4 Jaabadiro bu amiihai aivojito, amiihai jeecivominaaco imihuseme omoonibadi, imino momooni. Mehesafoto tolliro bu amiihai, amiihai Aivojiibo niqejefaño iicaaboma mihicahi. ² Suufenitimo Moocaanima mihiimaa imino mehesicinimoro, bu Moocaanico fanoovahallivi imomoro mihica icano. ³ Tolliro bu mihihallivi Moocaanima mihiimaa, Aivojiibo mihaico aamusunofeenedi taajasujiibogoco mijiiibeguequi, Cristo jiiibogo agaajarautinoti mijiiibeguequi icano. Miiro tobogohalliti jino uujoho civojafaño icahi. ⁴ Jaanohallivi Moocaanima mihiimaa imino foovono uujoho toonoco gaajasuqui omoonijibadi. ⁵ Quehecuno mihica miyaavogominaa iicatimoma sicamañovi ifafucuvaaco mafatysudino. ⁶ Fahiijivaro imino mihiimaahica imo imo. Imino magaaja sitaaco mihiimusuhicajinoco.

Niino Iimaa.

(1Co 12.4-11)

⁷ Magajjiibo monahabo Tiquico onoobo mihaico jeevesutiibo aamusuhicaabo, bu uuma sano Aivojiiboco ejeevehicaabo, amiihaico paryi uuti imino jiiibegueji. ⁸ Tooneguuiha amiihaijaago diiboco galluuhi amiihaico jilli mihicahi ineequi, bu amiihaico iquehecutusuqui icanouno mihica miyaavogomi. ⁹ Tolliro bu diiboma foobo magajjiibo mihaicoro ejeevesuhicatiibo monahabo Onesimo diibo amiihaiti saafi iicaabo. Diitisi amiihaico jiiibegueji paryi juu iicanoco.

¹⁰ Tacivojati uco anahaboniibo Aristaco onoobo amiihaijaago iijico galluuhi, tolliro bu Marco Bernabe nahabo icoomoobo achi amiihaijaa iijico galluuhi. Diibo amiihaico iijiiibeguehicacuubo. Jaabo amiihaico abaatohachijji diiboco imino magaayici. ¹¹ Tolliro bu Justo onooboco bu Jesu enehicaabo iijico amiihaijaago galluuhi. Jito idiimoro judiimiti imiyaavugucuumoti Moocaani aivojiguiiha uuma sano ududicamaaimo. Jaamofenedi uujoho tafiico jacusucafetehi. ¹² Tolliro bu Cristo jeecivominaafi Epafra onoobo amiihaijaago iijico galluuhi, diibo, bu saafi amiihaioobo iicaabo. Diibo fahiijivaro sihidi amiihaihallivi Moocaanico dilluhicahi diiboma ihiimaaboro. Jaamo amiihai quehecuno mihicamoro aivo imino amiihai jeebiico miminiyuhi Moocaani iimogonocoro

meheetavejinojaagoviro. ¹³ Uujoho imino gaajahi Epafra amiïhaiditi ifiico niji niji omoonihicanoco, bu tolliro Laodicea cuumiri iicamediti, bu Hierapoli cuumiri iicamediti icano iicahicanoco. ¹⁴ Tolliro bu magaijiiibo taabuminaafi Lucas iijico amiïhaijaa galluuhi, tolliro bu Demas onoobo icano.

¹⁵ Tolliro bu monahabomi Laodiceari iicamoco taajico mahaci. Tolliro bu Ninfa onoogoco taajico mahaci, bu tolliro diigo iijafaño iigaivehicamoco icano. ¹⁶ Jaamoro jihaameque amiïhaifeenevi memeeçidi magallu, bu tolliro Laodiceari iicaja Moocaani iijafaño imeeciçui. Tolliro bu amiïhai memeeçi uujoho Laodicea iicamedi acaatinicuuhaameque. ¹⁷ Bu jinooco mijiiibogo Arquipo onooboco: Meeci, jaaboro imo diihifutusu Aivojiiibo ico diibo jeeçivo ducicamaajeque aaciininoco.

¹⁸ Uujoho Pablo jino ico idillunocoro, caatinihi jino tahuseri. Uco mehesafotomoro Moocaanima mihiimaa jino civojaminaafiti iicanohallivi. Jaafa amiïhaico Moocaani imino moonihi.